

## **Enyaarubha ya Pauro ku Bhakorosai Obhutaangiro**

Enyaarubha yino ekaamirwe na Pauro, omweega wa Yeesu Krisito, ku Bhakrisito bho omugye gwa Korosai. Korosai gwaari omugye musuuhu mukyaaro kya Asia (niyo Obhuturuki ya bhoono).

Pauro yakaamiri enyaarubha yino erii bhaga yaari mukibhoho. Ataagiiri Korosai omweene, nawe akiigwa kubha abheegya bho orurimi bhaari bharanyaakya Abhakrisito eyo. Abhakrisito bha Korosai harya bhaari amahizo abhiri, Abhakrisito bhe Ekiyahudi na bhe Ekiyunaani.

Abhaatu bhe Ekiyahudi bhano bheegirye ameeogyo go orurimi, bhaari bhareegya kubha eraabhe omuutu yaari omwaanamweega wa Yeesu, ataanagirye okwiikiriribhwa na Taatabhugya eraabhe ataasaarirwe no okutuniirira emigiro ne eziinyaangi zye Ekiyahudi. Abhaatu bhe Ekiyunaani bhano bheegirye ameeogyo go orurimi, bhaari bhareegya kubha, kwe ekigirirye bhakarora kubha omubhiri gune ebhibhi na Taatabhugya atana ebhibhi, etaari kuturikana Yeesu abhe Taatabhugya na yiikare mukyaaro kyo omuutu.

Pauro arakyoora iguru wa ameeogyo gayo go orurimi kwo okugaamba obhuheene kwiiguru wa Yeesu. Yeesu Krisito ni Taatabhugya, ari iguru

we ebhigiro bhyoosi mukyaaro na mwiisaaro. Akiikara mukyaaro, yaari muutu, na akakwa kwiiguru ye ebhibhi bhyeetu okubha twaabhirwe. Omuutu araamwiikirirye Yeesu, bhutariho obhweendi bhwo okutuniirira eziinyaangi zyozyoosi.

Pauro arabhabhuurira Abhakrisito kubha, ereenderwa bhatige eteemo embiihu ye ekare, no okutaanga kubha no obhwiikari obhuhya bhuno bhukumuzomera Taatabhugya.

### *Obhukeerya*

<sup>1</sup> Enyaarubha yino nikaamiri enye Pauro, nikabhirikirwa kubha omweega wa Krisito Yeesu kwo obhuseegi bhwa Taatabhugya, niari hamwe na Timoteo, omwiikirirya omurikyeeetu.

<sup>2</sup> Turabhakaamira emwe abhahoreeru\* bhano mukwiikara mumugye gwa Korosai, emwe abhaheene abharikyeeetu kwo okugwaatana na Krisito.

Orubhaango no omureembe okurwa ku Taatabhugya Taata weetu, bhibhe neemwe.

### *Amasabhi no okumubhuurira Taatabhugya “Ozomirye”*

<sup>3</sup> Kyoomeera turamubhuurira Taatabhugya, “Ozomirye, Taata wo Omukuru weetu Yeesu Krisito,” hano tukubhasabhira emwe.

<sup>4</sup> Turakora ego, kwo okubha twiigwiiri kyeego mukumwiikirirya Krisito Yeesu, no okubhaseega abhahoreeru bhoosi.

---

\* **1:2 Abhahoreeru.** Rora eng'ana yino mu Bhugaruri bhwa Amang'ana Amakong'u.

<sup>5</sup> Obhwiikirirya bhweenyu no obhuseegi bhweenyu bhuratuukana ne eriisigo ryeenyu kubha, murasuung'aana orubhaango runo Taatabhugya abhatuuriiri mwiisaaro. Mumariri kwiigwa iguru ye eriisigo riyo hano mwarwaaziirwe amang'ana go obhuheene, nago nigo Amang'ana Amazomu.

<sup>6</sup> Amang'ana Amazomu gayo gaahikiri kweemwe, bhoono garanyaragana mukyaaro kyoosi. Garageenderera kugirya abhaatu bhamukyoorere Taatabhugya, kyeego ekatuukira kweemwe kweema orusiku runo mwiigwiiri iguru yo orubhaango rwa Taatabhugya, no okumenya obhuheene iguru yo orubhaango rwaaye.

<sup>7</sup> Emwe mukeega Amang'ana Amazomu gayo okurwa ku Epafura, omurikyeetu omuseegwa. Ewe ni muhokya omuheene wa Krisito kwiiguru weenyu.

<sup>8</sup> Woosi atubhuuriiri iguru yo obhuseegi bhweenyu bhuno bhukutuukana ne Ekoru Muhoreeru.†

<sup>9</sup> Kwe ekigirirye kiyo, tukyaari kutiga kubhasabhira, kweema orusiku runo tukiigwa amang'ana geenyu. Turasabha Taatabhugya abhahe amang'eeni goosi kugano ewe akweenda. Na kuriyo, abhahe amang'eeni goosi no obhumenyi bhuno bhukurwa kwe Ekoru Muhoreeru.

<sup>10</sup> Niho muraanagye kwiikara kyeego Omukuru Yeesu akweenda, no okumuzomeerya

---

† **1:8 Ekoru Muhoreeru.** Rora amang'ana gano mu Bhugaruri bhwa Amang'ana Amakong'u.

mumang'ana goosi. Obhwiikari bhweenyu bhuramuzomera kwe emirimo gyeenyu emizomu, kweeki murakiraho okumumenya Taatabhugya.

<sup>11</sup> Kweeki turasabha Taatabhugya abhe arabhagumirya kwo obhuturo bhwaaye obhukuru, okubha munagye kukong'era. Ambe, mubhe no obhuzomererwa kugoosi

<sup>12</sup> mukubhuga, “Ozomirye, Taata Taatabhugya,” kwo okubha abhasakiirye okung'arira kusuung'aana engabho ya abhahoreeru bhano abhatuuriiri mubhutemi bhwo obhweero.

<sup>13</sup> Atutuuriirye okurwa mubhutemi bhwe ekiirima, atusaamirye no okutusikirya mubhutemi bhwo Omwaana waaye‡ omusegwa.

<sup>14</sup> Kwo okuhitira Omwaana waaye tutuuriibhwe, kwo okubha ebhibhi bhyeetu bhyaabhiirwe.

*Omwaana wa Taatabhugya ano obhuturo iguru wa bhyoosi*

<sup>15</sup> Omwaana wa Taatabhugya niwe ekireengyo kyeego Taatabhugya ari, yiingabha Taatabhugya omweene atakurorekana.

Ewe niwe omukuru wo obhuturo iguru ye ebhigiro bhyoosi,

<sup>16</sup> kwo okubha kwo okuhitira kweewe, ebhigiro bhyoosi bhyaateemirwe, bhino bhiri mwiisaaro na bhino bhiri mukyaaro,

‡ **1:13 Omwaana waaye.** Rora *Omwaana wa Taatabhugya* mu Bhugaruri bhwa Amang'ana Amakong'u.

bhino bhikurorekana na bhino bhitakurorekana,  
bho obhunagya kasi abhatemi, abhakuru kasi  
bha amanaga.

Bhyoosi bhyaateemirwe kwo okuhitira ewe na  
kwiiguru waaye.

<sup>17</sup> Ewe yaari ariho bhikyaari kubhaho ebhigiro  
bhyoosi okuteemwa,  
na aragirya ebhigiro bhyoosi bhihaagwaatana  
hamwe.

<sup>18</sup> Ewe niwe omutwe gwo omubhiri, no omubhiri  
nigwe ekanisa.

Ewe niwe obhweemero,  
kweeki, yaari omutaangi okuryooka okurwa  
mubhaku,  
okubha abhe omukuru iguru we ebhigiro  
bhyoosi.

<sup>19</sup> Niigo, kwo okubha ekazomera Taatabhugya  
kubha,  
obhukuunaanio bhwaaye bhwoosi bhuri muusi  
wo Omwaana waaye.

<sup>20</sup> Kweeki, ekamuzomera Taatabhugya kubha,  
yiiigwaanie ebhigiro bhyoosi neewe kwo  
okuhitira Omwaana waaye,  
ebhigiro bhino bhiri mukyaaro muno na bhino  
bhiri mwiisaaro.

Akakora ego kwo okureeta omureembe,  
okuhitira amanyiinga go Omwaana waaye gano  
gakiitika kumusaraba.

<sup>21</sup> Inyuma hayo, neemwe mwaari kure na  
Taatabhugya. Mwaari abhabhisa bhaaye,  
mumiiseego geenyu, gano gaagirirye eziiteemwa  
zyeenyu eziimbiihu. Nawe bhoono Taatabhugya  
abhiigwaanirye neewe,

<sup>22</sup> kwe enzira yo oruku rwo omubhiri gwa Krisito. Akakora ego okubha abhareete embere waaye murabha abhahoreeru, mutana isarya naabhe amasoro.

<sup>23</sup> Nawe mureenderwa okugeenderera kwiikirirya Amang'ana Amazomu, mukubha bhagumiru no okubha na amanaga. Mutang'eenwa na abhaandi okutiga eriisigo rino mukabhona hano mukiigwa Amang'ana Amazomu. Amang'ana gayo Amazomu garwaazirwe kubhaatu bhoosi bha mukyaaro hano, na neenye Pauro nibheeri omuhokya waaye.

*Emirimo gya Pauro mumakanisa*

<sup>24</sup> Bhoono nirazomererwa enyaako yino nikubhona kwiiguru weenyu. Mumubhiri gwaane niragwaatana ne enyaako ya Krisito kwiiguru yo omubhiri gwaaye, nigwe ekanisa.

<sup>25</sup> Taatabhugya anituuriri enye kubha omuhokya we ekanisa yaaye, okubha nibharwaazire emwe eng'ana yaaye yoosi kyeego eri,

<sup>26</sup> nikyo okugaamba, embiso yaaye yino yabhisirwe kweema ekare kurwiibhuro rwoosi. Nawe bhoono Taatabhugya ayikuundukuriiri abhahoreeru bhaaye. §

<sup>27</sup> Taatabhugya akaseega okubhakuundukurira obhuzomu bhwe embiso yo okuruguurya no obhuguungo kubhaatu bhano bhatari Abhayahudi. Embiso yiyo ni Krisito ari muusi weenyu, ewe niwe eriisigo

---

§ 1:26 Rora Abhaefeso 3:3-6.

ryeetu kubha tusikire mubhuguungo bhwa Taatabhugya.

<sup>28</sup> Krisito niwe wuno tukumurwaaza hano tukurekya no okweegya abhaatu bhoosi kwa amang'eeni goosi. Kweego turamurwaaza ewe, okubha tureete bhoosi embere wa Taatabhugya, bhagumiiri kutuukana no okugwaatana kwaabhu na Krisito.

<sup>29</sup> Ni kwe ekigirirye kiyu nirabha no omukya kuhizana ne emirimo kwo okuhokeerya amanaga maaru gano Krisito akuuniha.

## 2

<sup>1</sup> Ndeenda mumenye kyeego nikuhizana ne emirimo kwiiguru weenyu, na kubhaatu bha mumugye gwa Raodikia bhano bhakyaari kunirora, na kwiiguru ya abhaandi bhoosi bhano bhakyaari kunirora enye.

<sup>2</sup> Nirakora ego okubha mutoongerwe egoro no okugwaatanibhwa mubhuseegi, na mwiizuribhwe obhuheene bhwaaru mumang'eeni goosi gano gakubhaha obhuheene. Niho muramenya embiso ya Taatabhugya, nayo ni kumumenya Krisito omweene.

<sup>3</sup> Muusi waaye nimwe ziibhisiri eziihata zyoosi zya amang'eeni no obhumenyi.

<sup>4</sup> Nirabhakaamira gayo, okubha mutiikirirya okung'eenwa no omuutu wowoosi kumang'ana go orurimi, naabhe kwa amang'ana go okusaambaarukya bhukong'u.

<sup>5</sup> Niragaamba ego, kwe ekigirirye kyo okubha hamwe neemwe mukoro, yiingabha nitari hamwe neemwe kwo omubhiri. Nirazomererwa

kwo okubha niriigwa iguru yo obhumwe  
bhweenyu no obhukong'eru bhwo obhwiikirirya  
bhweenyu ku Krisito.

*Obhwiikari obhuhya bhwe Ekikrisito*

<sup>6</sup> Ambe bhoono, kwo okubha mumwiikiriirye  
Krisito Yeesu kubha ni Mukuru, mugeenderere  
kwiikara kwo okugwaatana neewe.

<sup>7</sup> Kweego, emiri gyeenyu gibhe muusi waaye,  
na mwoomboke obhuhoru bhweenyu iguru  
waaye, eno mukukong'era mubhwiikirirya  
kyeego mukeegibhwa. Kweeki mubhe abhaatu  
bhano bhakubhuga, “Ozomirye, Taatabhugya,”  
eriibhaga ryoosi.

<sup>8</sup> Mwiiriihe mutaaza kukaangiribhwa kwa  
ameegyo ga bhusa na go orurimi gano  
gakutuukana ne eziinyaangi zya abhaatu.  
Ameegyo gayo gariisigira eziikoro zino  
zirabhaaha ekyaaro kino\* na ameegyo gayo  
gatari ga Krisito,

<sup>9</sup> kwo okubha obhukuunaanio bhwoosi bhwa  
Taatabhugya bhuri muusi wo omubhiri gwa  
Krisito.

<sup>10</sup> Neemwe muheerwe obhukuunaanio  
bhwoosi bhwo okugwaatana na Krisito. Ewe  
niwe Omukuru iguru wa bho obhunagya na  
abhatemi bhoosi mukyaaro kino kitakurorekana.

<sup>11</sup> Eriibhaga mwagwaateeni na Krisito,  
mukasaarwa† kwe esaaro yino etakukorwa kwa

---

\* **2:8 Eziikoro zino zirabhaaha ekyaaro kino**, obhugazuro  
obhuundi bhuratura kubha, *ameegyo ge ekyaaro kino*. † **2:11**  
**Mukasaarwa**. Rora okusaarwa mu Bhugaruri bhwa Amang'ana  
Amakong'u.

amabhoko ga abhaatu, nawe kwe enzira ya Krisito, okubha aruusye omubhiri gwe ebhibhi.

<sup>12</sup> Eriibhaga mwabatiizirwe, mukakwa no okubhiikwa hamwe na Krisito, kweeki mukaryooka hamwe neewe, kwo okubha mukiikirirya eziinguru zya Taatabhugya wuno yamuryooriri okurwa mubhaku.

<sup>13</sup> Neemwe mwaari abhaku kwe ekigirirye kye ebhibhi bhyeenyu, kweeki mutasaarirwe omutima gweenyu gwe ebhibhi. Nawe Taatabhugya abhaheeri obhuhoru hamwe na Krisito na atwaabhiiri ebhibhi bhyeetu bhyoosi.

<sup>14</sup> Hano Yeesu yanyaakiibhwe kumusaraba, amakaamo ge emigiro gano gakatutinira ekiina, gakanyaakibhwa hamwe neewe, nikyo tukugaamba eriibhaga riyo Taatabhugya akayirusya esiiri yeetu ye ebhibhi.

<sup>15</sup> Kweego Taatabhugya akabharuusya abhatemi bhoosi obhunagya mukyaaro kino kitakurorekana, akabhahiza kimwe.

<sup>16</sup> Ambe, omutu wowoosi atabhatinira ekiina kwo okubha murarya ebhyaakurya ne ebhinyweebhwa bhino bhakubhuga migiro, kasi kwo okubha mutakutuniirira Enyaangi yo Okuhiita, kasi enyaangi yo okutaazwa omweeri, kasi orusiku rwo okumuunya.‡

<sup>17</sup> Gayo goosi ni kizuruuru kya amang'ana gano Abhayahudi bhaari bhariiseegera kubha garaaza. Nawe amang'ana ageene gari ku Krisito omweene.

---

‡ **2:16 Orusiku rwo okumuunya.** Rora amang'ana gano mu Bhugaruri bhwa Amang'ana Amakong'u.

18 Bhariho abhaatu bhano bhakukumiirirya bhukong’u amang’ana go obhusuuku bhwi igutu na go okuseengera bhamaraika. § Mutabhiikirirya bhataaza bhakabharuusya esaambo yeenyu ya kirakeego. Abhaatu bhayo bhariizuungya, kwo okubha bharabhuga bharuuzi amang’ana gayo mubhurori. Nawe kwe eheene, bhatumbaahiri kwa amiiseego gaabhu mabhiihu ge ekyaaro.

19 Abhaatu bhayo, bhiiyaahwiiri na Krisito wuno akukaangata ekanisa, araabhe omutwe gwo omubhiri gwaaye. Krisito niwe arariisya no okugwaatania hamwe ebhiimo ne emigiha gyoosi. Kweego, omubhiri gwaaye gwoosi gurakiina bhuzomu kyeego Taatabhugya akweenda.

20 Emwe, mukakwa hamwe na Krisito, na kweego akabhatuurya okurwa mubhubhaahi bhwe eziikoro zino zikubhaaha ekyaaro kino.\* Ambe, ni kwaki muriikara kyeego abhaatu bha mukyaaro muno? Mutiikirirya okwiigwa obhuswaagyo kya bhuno,

21 “Mutagwaata kino! Mutakunia kirya! Mutasama kiyo!”

22 Gayo goosi ni iguru we ebhigiro bhino bhikusarika kwiibhaga iguhi okumara okuhokeeribhwa, eheene ni migiro na ameegyo ga abhaatu abheene.

23 Ni heene, bhano bhakutuniirira

---

§ 2:18 **Bhamaraika**. Rora eng’ana *maraiika* mu Bhugaruri bhwa Amang’ana Amakong’u. \* 2:20 **Eziikoro zino zikubhaaha ekyaaro kino**, obhugazuro obhuundi bhuratura kubha, *ameegyo ge ekyaaro kino*.

obhuswaagyo bhuyo bhararorekana kubha bhana amang'eeni. Bharatuniirira obhusabhi bhuno bhiituuriiri abheene, obhusuuku bhwiigutu no okubhaaha emibhiri gyaabhu kwo obhuhaari. Nawe obhuswaagyo bhuyo bhutakutura kuribhira enaamba embiihu yo omubhiri.

### 3

<sup>1</sup> Bhoono, kwo okubha muryookiri hamwe na Krisito, mukomye amang'ana ga mwiisaaro, eno Krisito yiikeeri orubhaara rwo obhuryo rwa Taatabhugya.

<sup>2</sup> Mwiiseege amang'ana gano gari mwiisaaro, mutiiseega ga mukyaaro muno,

<sup>3</sup> kwo okubha mukuuri hamwe na Krisito. Bhoono muriikara hamwe na Krisito embere wa Taatabhugya. Nawe obhwiikari bhuyo hamwe neewe bhutakurorekana kubhaatu abhaandi.

<sup>4</sup> Kweego, obhuhoru bhweenyu bhuratuukana na Krisito. Eriibhaga rino araarorekane, niho neemwe muraarorekane hamwe neewe no okugwaatana mubhuguungo bhwaaye.

<sup>5</sup> Ambe bhoono, mutaase kure amang'ana goosi ga mukyaaro kino gano gari muusi weenyu, nago ni bhuseebheeti, amakire, enaamba embiihu, amiiseego mabhiihu ne enaamba ye ebhigiro. Kubha ne enaamba ye ebhigiro ni kisi no okuseengera emisaambwa, okutiga kumuseengera Taatabhugya.

<sup>6</sup> Amang'ana kya gayo, nigo gakukora Taatabhugya atiindire abhaatu bhano

bhatakumwiigwa.\*

<sup>7</sup> Hano mwaari muragwaatana na abhaatu kya bhayo, neemwe mwaari muriikara kuriing'aana na amang'ana gayo amabhiihu.

<sup>8</sup> Nawe bhoono, mutige bhukong'u amang'ana goosi gayo, kyeego obhuhaari, obhururu, obhubhi, amatuki na amang'ana amabhi ge eziisoni gano gatakweenderwa muminwa gyeenyu.

<sup>9</sup> Mutabhuurirana orurimi, kwo okubha muruusirye eziiteemo zyeenyu zye ekare hamwe na amahokya gaaye,

<sup>10</sup> na mwiibhohiri omutima omuhya. Taatabhugya omweene akateema omutima omuhya, na arageenderera kugukora gutuubhane bhukong'u neewe, okubha munagye okumumenya bhuzomu.

<sup>11</sup> Kweego, bhutariho obhwaahuri gati yo Omuyahudi na wuno atari Omuyahudi, wuno asaarirwe na wuno atasaarirwe, omuutu wuno akurweera ekyaaro kya kure naabhe abhe omutuumbaahu, abhe omugya kasi wuno atari mwiiragaanzi. Nawe Krisito niwe omurito, na neewe ari muusi wa bhoosi.

<sup>12</sup> Bhoono, kwo okubha emwe mubheeri abhasorwa bha Taatabhugya, na abhahoreeru abhaseegwa, mubhe bhe ebhigoongi, abhazomu, abhasuuku, abhanyoohu na abhiikong'ererya.

<sup>13</sup> Kweego mwiigumiirirye ne eraabhe owumwe weenyu ane eng'ana kumurikyaaye,

---

\* **3:6** Amakaamo agaandi ge Ekiyunaani gatana amang'ana *abhaatu bhano bhatakumwiigwa*. Rora Abhaefeso 5:6.

mwaabhirane kyeego Omukuru yabhaabhiiri emwe.

<sup>14</sup> Kukira gayo goosi mwiiseege, kwo okubha obhuseegi nibhwo bhurabhagwaatania bhoosi mubhumwe bhuno bhukuunaaniri.

<sup>15</sup> Omureembe gwa Krisito gubhaahe muziikoro zyeenyu. Emwe mubheeri omubhiri gumwe, kweego mubhirikiirwe kwiikara kwo omureembe. Kweeki mubhe murabhuga, “Ozomirye, Taatabhugya.”

<sup>16</sup> Eng’ana ya Krisito yiikare kwo obhwaaru muusi weenyu, eno muriyeegya no okurekyana no okwiikyooro kwa amang’eeni goosi. Mumweembere Taatabhugya kwe eziikoro zyeenyu no okubhuga, “Ozomirye,” kwe ezaburi na ameembo go okumukumya Taatabhugya.

<sup>17</sup> Gogoosi gano mukugaamba kasi kukora, mukore kuriina ryo Omukuru Yeesu, mukubhuga, “Ozomirye, Taata Taatabhugya,” kuhitira kweewe.

### *Obhwiikari obhuzomu muziinyumba zya Abhakrisito*

<sup>18</sup> Emwe abhakari, mubhe murabhiigwa abhasubhe bheenyu, kyeego ekweenderwa kubhaatu bhano bhakumwiigwa Omukuru Yeesu.

<sup>19</sup> Neemwe abhasubhe, mubhe muraseega abhakari bheenyu, mutabha bhahaari kweebho.

<sup>20</sup> Neemwe abhaana, mubhe murabhiigwa abhiibhuri bheenyu mugoosi, kwo okubha okukora ego kuramuzomera Omukuru Yeesu.

<sup>21</sup> Neemwe bhataata, mutabhazabhura abhaana bheenyu, okubha bhataaza bhakakwa emitwe.

<sup>22</sup> Neemwe abhagya, mubhiigwe abhakuru bheenyu bha mukyaaro hano kwe emirimo gyoosi. Mutakora ego hano bhakubharora ego okubha mwiiyeerekye kubha mureenderwa, nawe mubhasuuke eriibhaga ryoosi kwo obhuheene bhwe egoro, kwo okubha muramusuuka Omukuru Yeesu.

<sup>23</sup> Ryoryoosi rino mukukora, mukore kwe egoro yimwe, kwe ekigirirye kyo Omukuru, ne etari iguru ya abhaatu.

<sup>24</sup> Muhiite kubha Omukuru wuno mukumuhokeerya niwe Krisito, na niwe akubhaha engabho yino abharagiiri.

<sup>25</sup> Nawe wowoosi wuno akukora amabhi arasuung'aana kuriing'aana no obhubhi bhwaaye, kwo okubha Omukuru atana bhwaahuri.

## 4

<sup>1</sup> Neemwe abhakuru, mubhe murabhakorera abhagya bheenyu kwe eheene na kyeego ekweenderwa. Muhiite kubha neemwe mwoosi munawe Omukuru mwiisaaro.

### *Obhuswaagyo na amasabhi ga Pauro*

<sup>2</sup> Mubhe murasabha eziisiku zyoosi, murateengeeza no okumubhuurira Taatabhugya, "Ozomirye."

<sup>3</sup> Mutusabhire na neetwe okubha Taatabhugya atwiigurire enzira yo okurwaaza eng'ana yaaye iguru wa Krisito, yino ekare yaraarikiri embiso

yaaye. Na neenye nibhohirwe kwiiguru yo okurwaaza amang'ana gayo.

<sup>4</sup> Kweego, mubhe murasabha Taatabhugya kubha, nibhe na amanaga go okurwaaza kubhweero amang'ana gayo kyeego nikweenderwa kugaamba.

<sup>5</sup> Mubhe na amang'eeni mubhwiigwaani bhweenyu na bhano bhatakumwiikirirya Omukuru Yeesu. Mutabhurya eriibhaga.

<sup>6</sup> Amang'ana geenyu gabhe mazomu na go okusakirya, okubha mumenye kyeego mukweenderwa kukyoora abhaatu bhoosi bhuzomu.

### *Amang'ana go okuraga*

<sup>7</sup> Omwiikirirya omurikyeetu omuseegwa Tikiko ni muhokya omuheene. Turakora emirimo gyo Omukuru Yeesu kwa hamwe. Ewe arabhabhuurira amang'ana gaane goosi.

<sup>8</sup> Nimutumiri kweemwe okubha abhaganire amang'ana geetu no okubhatoongera eziikoro zyeenyu.

<sup>9</sup> Araaza hamwe na Onesimo, omwiikirirya omurikyeetu. Ewe niwe omuutu wo oweenyu no omuseegwa omuheene. Bharabhabhuurira amang'ana goosi gano gakukorwa oweetu hano.

<sup>10</sup> Aristariko, wuno abhohirwe hamwe na neenye mukibhoho hano, arabhakeerya. Mariko, wamwaabhu Barinaaba, arabhakeerya. Mumariri kusuung'aana amaragiriryo iguru waaye. Hano araahe kweemwe, mumusuung'aane bhuzomu.

<sup>11</sup> Yeesu neewe, wuno akubhirikirwa Yusito, arabhakeerya. Gati wa Abhayahudi bhano

bhiikiriirye Krisito, bhano ego nibho bhakukora emirimo kubhutemi bhwa Taatabhugya hamwe na neenye, nabho bhanitoongeeeri ekoro bhukong'u.

<sup>12</sup> Epafura, omugya wa Krisito Yeesu no omuutu wo oweenyu, arabhakeerya. Eriibhaga ryoosi arakora omukya kubhasabhira emwe kubha mugumire mubhwiikirirya bhweenyu no okukong'a, mukubha no obhukaari kugoosi gano Taatabhugya akweenda.

<sup>13</sup> Ndamumenyeekererya kubha, arakora emirimo kwo omukya kwiiguru weenyu na kubhaatu bhe emigye gya Raodikia na Hierapori.

<sup>14</sup> Omugabhu weetu omuseegwa Ruuka na Dema, bharabhakeerya.

<sup>15</sup> Emwe, mubhakeerye abhiikirirya abharikyeetu bha Raodikia. Kweeki mumukeerye Nimufa, na abhaatu bhe ekanisa bhano bhakusikanira munyuumba yaaye.

<sup>16</sup> Hano mukumara okusoma enyaarubha yino kweemwe, muyihikye kubhiikirirya bhe ekanisa ya Raodikia okubha bhayo nabho bhayisome. Neemwe mukomye enzira yo okubhona enyaarubha yino nikabhatumira ebho muyisome.

<sup>17</sup> Mumubhuurire Arikipo kubha, amare bhuzomu emirimo gino Omukuru amuheeri.

<sup>18</sup> Enye Pauro nirakaama obhukeerya bhuno kwo okubhoko kwaane omweene. Muhiite kubha niri mukibhoho. Orubhaango rwa Taatabhugya rubhe hamwe neemwe.

**Eriiragano Eriihya**  
**The New Testament in the Zanaki language of**  
**Tanzania: Eriiragano Eriihya**

copyright © Wycliffe Bible Translators, Inc.

Language: (Zanaki)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-13

---

PDF generated using Haiola and XeLaTeX on 11 Mar 2026 from source files dated 13 May 2025

59cdaa0a-a2d1-5bd9-b56f-be1ffc1ff2aa